

ԾԱՂԿԵՊՍԱԿԸ ՈՐՊԷՍ ՑՈՒՑԱՊԱՍՏԱՌ
(Ցեղասպանությունը եւ հայ ինքնությունն պատկերագրությունը)¹

Յարութիւն Սարութեան

Ազգային ինքնութեան խօսուելու դրսեւորումները են պատկերներն ու գրաւոր բանաձեւերը, որոնք, որպէս կանոն, մեծ թուով ի յայտ են գալիս հասարակութեան համար ճշմարտամային պահանջներ²: Այս առումով ուսումնասիրութեան հարուստ եւ մեծ դաշտ է ներկայացնում Ղարաբաղեան շարժումը (1988-1990)³:

Ղարաբաղեան շարժումն իրապէս համաժողովրդական առաջին ընդվզումն էր Խորհրդային Միութեան տարբեր ծայրերում ծաւալուած զանգուածային ելոյթների շարքում: Այդ պատճառով էլ, նախադէպ չունենալով, իրեն բնորոշ առանձնայատկութիւններն այն մշակում էր տարբերայնորէն, պետական հզօր մեքենային դիմակայելու պայմաններում: Արագօրէն փոփոխուող իրադարձութիւններին զուգընթաց, կերպափոխում էր եւ ժողովրդի ինքնութիւնը՝ 1990 թ. ցուցարարը էապէս տարբերում էր 1988 թ. փետրուարեան հանրահաւաքների մասնակցից:

Ի թիւս Շարժումով կեանքի կոչուած վառ երեւոյթների, կարելի է նշել ժողովրդական ստեղծագործութեան իսկական պոռթկումը, ինչը յատկապէս ակներեւ դրսեւորուեց Շարժման բոլոր փուլերին ուղեկցած եւ իրադրութեան բոլոր փոփոխութիւններին անմիջապէս արձագանքած պատկերագիր «վիզներում»՝ ցուցապատառներում⁴: Դրանցով շատ յարմար է հետեւել Շարժման անցած բոլոր փուլերին, քաղաքական կողմնորոշումներին եւ ինքնութեան ձեւափոխմանը⁵: Հարկ է նշել, որ Հայաստանի հայազգի բնակչու-

թեան այժմեան ինքնութեան մի շարք գծեր ձեւաւորուել են հէնց Ղարաբաղեան շարժման տարիներին:

Շարժման ընթացքում եւ յաջորդող տարիներին տողերիս հեղինակը հաւաքել է շուրջ 1000 միաւոր ցուցապատառներ: Դրանց շարքում կարելի է առանձնացնել մօտ 20 թեմատիկ խումբ, որոնցից կարեւորագոյններն են. 1. հայերի ցեղասպանութիւնը (աւելի քան 315 ցուցապատառ), 2. Ղարաբաղը՝ Հայաստանի մաս (60), 3. ԽՍՀՄ դեկալարութեան քննադատութիւնը (58), 4. հայ ժողովուրդ, հայոց լեզու եւ հայ դպրոց (52), 5. բիւրոկրատիա, վերակառուցման ու հրապարակայնութեան քաղաքականութեան թշնամիներ, մամուլի ծախուածութիւնը (49), 6. Ղարաբաղը եւ դեմոկրատացման քաղաքականութիւնը (31), 7. Հայաստանի անկախութիւնը (30), 8. Ադրբեյջան եւ ադրբեյջանցիներ, պանիսլամիզմ եւ պանթիւրքիզմ (30), 9. վերաբերմունքը ԽՄԿԿ-ի նկատմամբ (27), եւ այլն:

Այս ցուցակում նկատուում է մի հետաքրքիր առանձնայատկութիւն՝ ցեղասպանութեանը նուիրուած ցուցապատառների մի քանի անգամ գերակշիռ լինելը Ղարաբաղեան շարժման՝ թուում է, թէ հիմնական գաղափարի՝ Արցախի եւ Հայաստանի վերամիաւորմանը նուիրուած ցուցապատառների նկատմամբ: Ի՞նչն է բանը: Այս հարցին ես փորձել եմ պատասխանել ցուցապատառների իսկ օգնութեամբ: Սոյն յօդուածն այդ շարքի մի հատուածն է միայն:

* * *

Ցեղասպանութեան թեմայի արծարծումը Խորհրդային Հայաստանում քաղաքական նկատառումներով երկար ժամանակ փաստօրէն արգելուած էր: 1960-ական թթ. խրուչչովեան «ձնհալի» հետեւանքով էր թերեւս, որ 1965 թ. ապրիլին, ցեղասպանութեան 50-ամեակի նշման ժամանակ, Երեւանում տեղի ունեցան զանգուածային ելոյթներ, որոնք այդ ժամանակներում Խորհրդային Միութիւնում բաւականին անսովոր երեւոյթ էին: Այդ ելոյթները եւ դրանց յաջորդող՝ դրակասութեան ու արուեստի մէջ ցեղասպանութեան թեմայի նկատմամբ հետաքրքրութեան կտրուկ աճը վկայում են, որ ցեղասպանութեան յիշողութիւնը, չնայած այն լուութեան մատնելու պաշտօնական քաղաքականութեանը, շարունակում էր ապրել մարդկանց հոգիներում եւ զիտակցութեան մէջ: Ընդ որում, այդ յիշողութեան մէջ հայերը բացառապէս ներկայացում էին որպէս անմեղ զոհ, որը կորցրել է իր պատմական հայրենիքի մեծ մասը եւ կարիք է զգում կարեկցանքի: Մինչդեռ ազգային-ազատագրական պայքարի եւ դրա ֆիդայի-հերոսների թեման շարունակում էր մնալ չյայտարարուած արգելանք: Այդ ժամանակաշրջանի եղեռնի թեման շոշափող գործերի հիմնական բովանդակութիւնը կարելի է ձեւակերպել Սիլվա Կապուտիկեանի «Մտորումներ ճանապարհի կէսին» պոեմի «խաղաղ վրէժի» պատգամով՝ «Դու պիտի վրէժ առնես ապրելով» կոչով⁶, որն անգամ մեր օրերում ընկալուում է որպէս հայ ժողովրդի հետագայ ճանապարհի ամենափառաբանական բանաձեւերից մէկը⁷:

Բնորոշ է, որ 1965 թ. ապրիլեան ելոյթների ժամանակ ցուցարարների ձեռքին մէկ-երկու պլակատ ու տրանսպարանտ էր միայն, ուր հայկական հարցի

արդարացի լուծման կոչ էր արւում⁸: Մէկ այլ մեծ, հաւաքական բնոյթի տրանսպարանտում, որ տանում էին բազմահազարանոց ցոյցի առջեւից, նշուած էր լոկ Մեծ Եղեռնի տարեթիւը՝ 1915 եւ զոհերի թիւը՝ 2 մլն: Դա բացատրում է, թերեւս, այն բանով, որ այդ ելոյթները չհասցրին վերաճել ժողովրդական շարժման:

1965 թ. ելոյթները նպաստեցին այն բանին, որ Երեւանում, Միծեռնակաբերդի գեղատեսիլ բարձունքին, բայց որ ամենակարեւորն է՝ քաղաքի կենտրոնից հեռու, բաւականին կարճ ժամկէտում կառուցուեց յուշահամալիր⁹, այնպէս որ 1968 թ. ապրիլի 24-ին ժողովուրդը դուրս եկաւ ոչ թէ մայրաքաղաքի կենտրոնական փողոցներն ու հրապարակները, այլ կազմակերպուած շարասիւններով շարժուեց դեպի քաղաքի ծայրամասը, որպէսզի ծաղիկներ ու ծաղկեպսակներ դնի ցեղասպանութեան զոհերի յուշարձանին: Այդպիսով, 1965 թ. ապրիլի 24-ի զանգուածային ելոյթները յաջորդ տարիներին ձեւափոխուեցին ոչ պաշտօնապէս թոյլատրուած սզոյ երթերի: 1970-ականների կէսերից դրանք փաստօրէն գլխաւորում էին Հայաստանի կոմունիստական դեկալարները, ովքեր վաղ առաւօտեան առաջին ծաղկեպսակն էին դնում յուշարձանին: Այդ երթերը եւս չէին ուղեկցում ցուցապատառներով, չնայած ծաղկեպսակներն ունէին սզոյ ժապաւէններ՝ ստանդարտ գրութիւններով, ձեւաւորուած «Եղեռնի զոհերին + կազմակերպութեան, հազուադէպ՝ ծաղկեպսակը դնող մարդկանց անուններ» բանաձեւով: Նման ձեւակերպումն ընդգծում էր այն հանգամանքը, որ մարդիկ յուշահամալիրն ընկալում էին որպէս մահարձան, այսինքն՝ մարդիկ գնում էին յուշահամալիր, ինչպէս կը գնային գերեզմանոց՝ ի-

րենց ծանօթի կամ հարազատի գերեզմանին այցի: Յուցապաստառների, այն է՝ զգացմունքների գրաւոր եւ պատկերային հրապարակաւ դրսեւորումների բացակայութիւնը մասամբ լրացւում էր սգոյ երթի առանձին մասնակիցների բանաւոր ստեղծագործութեամբ. մարդիկ կարողւմ կամ արտասանում էին հայրենասիրական բնոյթի, ինչպէս նաեւ ցեղասպանութեան թեմային առնչուող բանաստեղծութիւններ, ինչը, ի միջի այլոց, չէին խրախուսում քաղաքացիական հագուստ եւ թեւքերին կապոյտ ժապաւէններ կրող հասարակական կարգի պահպանները, որոնք մեծ քանակութեամբ ներկայ էին լինում յուշահամալիր-գրօսայգու ամողջ տարածքում եւ, մասնաւորապէս, յուշարձան տանող ճանապարհի երկայնքով: Հետաքրքիր է ժապաւէնների գոյնի ընտրութիւնը՝ այն մօտ էր սգոյ աւանդական սեւ գոյնին, բայց գործառոյթով կատարում էր դրոժինիկի՝ միլիցիայի կամաւոր օգնականների կարմիր գոյնի ժապաւէնի դերը:

* * *

1988 թ. փետրուարի հայերի սումգայիթեան ջարդերից յետոյ, ցեղասպանութեան թեման կրկին ուժգնօրէն յիշեցրեց իր մասին: Ինչպէս եւ նախորդ տարիներին, ապրիլի 24-ի սգոյ երթի (նկ. 1) մասնակիցները ծաղկեպսակներ էին տանում, սակայն այս անգամ դրանք շատ աւելին էին, աչքի էին ընկնում բազմազանութեամբ ու աւելի ճոխ ձեւաւորմամբ: Հարկ է նշել, որ ապրիլի 24-ի երթը փաստօրէն առաջին պաշտօնապէս արտոնուած ցոյցն էր հանրահաւաքների 1988 թ. մարտեան արգելքից յետոյ, որով իշխանութիւնները փորձում էին կանխել փետրուարեան հանրահաւաքներից յետոյ սպասուող զանգուածային ելոյթների նոր փուլը: Ուստի զարմանալի չէր, որ ծաղ-

կեպսակներից զատ, մարդիկ տանում էին բազմաթիւ ցուցապաստառներ, այսինքն՝ սգոյ երթը գործնականում քաղաքական ցոյց էր, որի հիմնական բովանդակութիւնը սումգայիթեան ջարդերի նոյնացումն էր 1915 թ. Եղեռնի հետ: Այնուամենայնիւ, բուն՝ 1915 թ. ցեղասպանութեան թեման մնում էր, բնականաբար, գերիշխողը: Չնայած պլակատների թիւն այս ցոյցի ժամանակ համեմատաբար քիչ էր, ծաղկեպսակներն իրենք, կարելի է ասել, կատարում էին նման դեր, քանզի դրանց ձեւաւորումը, նախորդ տարիների համեմատութեամբ, շատ աւելի սիմվոլիկ-գեղարուեստական իմաստ ունէր: Հնարաւոր է, որ ծաղկեպսակների գերակշռութիւնը պայմանաւորուած լինէր նաեւ իշխանութիւնների կանխիչ գործողութիւններից 1988 թ. ապրիլեան երթի մասնակիցների զգուշանալով. ինչպէս իրաւացիօրէն ենթադրում էին նրանք, դժուար թէ իրաւակարգի հայ պահպաններն անյարգալից վերաբերուէին ցուցապաստառի դեր կատարող, սակայն աւանդաբար յուշային ֆունկցիա ունեցող ծաղկեպսակներին:

1989 եւ 1990 թթ. ապրիլի 24-ին, երբ Ադրբեջանում վերջին ջարդերի զոհերը հայերի գիտակցութեան մէջ արդէն ձուլուել էին 1915 թ. զոհերի զանգուածին, սգոյ երթերի ժամանակ օգտագործուող քաղաքական բնոյթի ցուցապաստառների թիւը նկատելիօրէն աւելացաւ: Ըստ երեւոյթին, դրանում դեր խաղաց նաեւ այն հանգամանքը, որ 1989 թ. ապրիլին, երբ «Ղարաբաղ» կոմիտէի անդամները բանտարկուած էին, իսկ քաղաքական ելոյթները՝ մեծապէս սահմանափակուած, մարդիկ օգտագործում էին ցանկացած թոյլատրուած միջոցառում քաղաքական ցոյցի վերածելու հնարաւորութիւնը: 1990 թ. ապրիլը՝ առաջին դեմոկրատական ընտրութիւնների նախաշեմը, ընդհանուր

առմամբ առանձնանում էր քաղաքական աւելի մեծ ազատութեամբ: Յաջորդ տարիներին, աջ ազգային ուժերի յաղթանակից ու անկախութեան հռչակումից յետոյ, քաղաքական բնոյթի ցուցապաստառների կարիք գործնականում արդէն չկար, եւ ծաղկեպսակները, որոնք աւելի էին պատշաճում ցեղասպանութեան զոհերի յուշարձանին, քան թէ պլակատն ու տրանսպարանտը, վերստացան իրենց աւանդական յուշային նշանակութիւնը:

* * *

Ծաղկեպսակների մի խումբ 1915 թ. ցեղասպանութեան անմեղ զոհերի յիշատակին ուղղուած իր յուշային գործառոյթն իրականացնում էր ծաղիկների դաշտի համապատասխան ձեւաւորմամբ:

Այսպէս, 1988 թ. ապրիլեան շորտեան մի ծաղկեպսակի կարմիր մեխակներով հիմնագոյնին սպիտակ մեխակներով ստեղծուած էր Մասիսների ուրուապատկերը, որի վրայ նոյնպէս կարմիր մեխակներով գրուած էր «1915»: Երկու տարի անց նոյն սկզբունքով ստեղծուած ծաղկեպսակի (նկ. 2) վրայի Մասիսների ստորոտին գրուած էր «75» (ցեղասպանութեան 75-ամեայ տարեդարձը), իսկ վերին ճախ անկիւնում՝ կրկին ծաղկային ձեւաւորմամբ, հայկական եռագոյն դրօշակն էր: Մասիսների ուրուապատկերով ձեւաւորուած ծաղկեպսակների աւանդոյթը շարունակուեց նաեւ 1990-ական թթ.: Մասնաւորապէս, 1999 թ. ապրիլի 24-ին հանդիպեց դեղին մեխակներով ստեղծուած Մասիսներ կանաչ ճիւղերի հիմնագոյնով ծաղկեպսակի վրայ, որ տանում էին «Ժողովրդական հայրենիք» կուսակցութեան գործիչները (նկ. 3): Քանի որ Մասիսների պատկերը վաղուց ի վեր համահայկական ինքնութեան խորհրդանշերից է¹⁰, ուստի դրանք ծաղկեպսակնե-

րի վրայ պատկերելով կարծես թէ ակնարկուում էր, որ ողջ հայութիւնն է նշում ցեղասպանութեան տարեդարձը, ծաղիկներ դնում ցեղասպանութեան զոհերի յուշարձանին ու այդպիսով յարգում զոհերի յիշատակը: Թերեւս նման գաղափար էր դրուած 1988 թ. ապրիլեան մէկ այլ ծաղկեպսակի ձեւաւորման մէջ. այն ստեղծուած էր մեծատառ «Ե»-ի՝ «Եղեռն» բառի առաջին տառի ձեւով, որի հորիզոնական գծիկի վրայ նոյնպէս ծաղիկներով ձեւաւորուած էին երկգագաթ Մասիսները (նկ. 4): Այդ ուշագրաւ գեղարուեստական լուծումը փաստօրէն շարունակում է հայ միջնադարեան ձեւագիր բնագրերում՝ բաւականին յաճախ հանդիպող գլխազարդերի պատկերային ձեւաւորման¹¹ աւանդոյթը: Եղեռնի զոհերի յիշատակի համահայկական յարգման գաղափարն էր թերեւս դրուած նաեւ 1989 թ. ապրիլի 24-ին հայոց պետականութեան խորհրդանշը հանդիսացող ազգային դրօշի (որը միայն մէկ տարի անց դարձաւ պետական) երեք՝ կարմիր, կապոյտ, նարնջագոյն գոյններով ձեւաւորուած ծաղկեպսակ-«պլակատների» ստեղծման հիմքում:

Շատ էին գունային տարբեր լուծումներ ունեցող խաչի պատկերներով ծաղկեպսակները: Այսպէս, 1989 թ. ապրիլի 24-ին Ամենայն հայոց եւ Մեծի տանն Կիլիկիոյ կաթողիկոսների՝ Վազգեն Ա-ի եւ Գարեգին Բ-ի անունից երկու ծաղկեպսակ էր դրուել՝ համապատասխանաբար սպիտակ խաչով՝ կարմիր հիմնագոյնին եւ կարմիր խաչով՝ սպիտակ հիմնագոյնին (նկ. 5): Այս տիպի ծաղկեպսակներին զուգահեռ, 1990-ական թթ. երկրորդ կէսին մեծ տարածում ձեռք բերեցին հէնց խաչաձեւ ծաղկեպսակները: 1990 թ. ապրիլի 24-ին Ֆիքսուած նման ծաղկեպսակներից մէկի խաչն ունէր խաչաձեւ իսկ գրու-

թիւն, կազմուած Հորիզոնական «Մեծ» եւ ուղղահայեաց «Շղեմ» բառերից՝ ընդհանուր կենտրոնական «ե» տառով: Ծաղիկներից կազմուած այդ խաչը տեղադրուած էր պատուանդանին եւ դա, ըստ երեւոյթին, բաւական էր, որ մարդիկ այն ընկալեն որպէս խաչքար եւ սկսեն ծաղիկներ դնել դրա հիմքին (նկ. 6):

Մասիսների եւ խաչի համակցմամբ ստեղծուած մի հետաքրքիր ծաղկեպսակ կար 1992 թ. ապրիլին Հայաստանի արտաքին գործերի նախարարութեան անուանից. Մասիսների գագաթների միջեւ տեղակայուած էր կլոր վահան եւ սուր, որի խաչածեւ բռնակն արեւի նման բարձրանում էր լեռան վերնամասում: Այս յորինուածքը բաւական «խօսուէն» է, չնայած այն ստեղծողները դժուար թէ գիտակցաբար ներդնէին մեզ տեսանելի իմաստը: Բանն այն է, որ խորհրդային մարդու գիտակցութեան մէջ վահանն ու սուրը հաստատուն կերպով գուգակցուած են Պետական անվտանգութեան կոմիտէի (ԿԳԵ) սիմվոլիկայի հետ, որը ջարդուած-փշրուած էր երկրի ինչպէս արտաքին, այնպէս էլ ներքին թշնամիներին: Ծաղկեպսակ-«պլակատի» վահանն ու սուրը, դատելով դրա «տիրոջից» եւ նուիրաբերման առիթից, միտուած էին պաշտպանութեան լոկ արտաքին թշնամուց, որն, ընդ որում, ընկալուած էր որպէս 1915 թ. ցեղասպանութեան մեղաւոր: Հետաքրքիր է, որ 1997 թ. արդէն պետանվտանգութեան մարմինների (որոնք վերանուանուել էին «ազգային անվտանգութեան մարմիններ» եւ ներքին գործերի մարմինների հետ կազմուած էին ընդհանուր նախարարութիւն) մի ստորաբաժանում յուշարձանին դրեց իւրօրինակ յօրինուածք ունեցող մի «ծաղկեպսակ», որն ունէր աւելի վառ արտայայտուած հայկական ինքնութիւն եւ առաջարկած գաղափարներով

միտուած էր տարածքային նկրտումներին: «Ծաղկեպսակը» նշանակալի չափերի մի կառոյց էր, որը կրկնուած էր Մեծ ու Փոքր Մասիսների ուրուպատկերը, որոնց գագաթները ձեւաւորուած էին եռագոյնով՝ Հայաստանի հանրապետութեան պետական դրօշի գոյներով (նկ. 7), իսկ դրանց ստորոտին գրուած էր ինչպէս նախարարութեան անուանումը, այնպէս էլ դրա մաս կազմող մի զօրամասի՝ «յատուկ մարտական ստորաբաժանում» անուանման յապաւումը՝ ՀՄՍ, ում կողմից որ բերուած էր ծաղկեպսակը:

Մասիսների, նրանից ծագող խաչի եւ նրա ստորոտում գտնուող մէկ այլ սրբութեան՝ գրքի (ամենայն հաւանականութեամբ, Սուրբ գրքի¹², այն է՝ Աստուածաշնչի) պատկերներով ձեւաւորուած հետաքրքիր ծաղկեպսակներ կային Եղեռնի զոհերի յուշարձանին 1999 եւ 2000 թթ. ապրիլեան «նուիրատուութիւններում» (նկ. 8): Հայ մարդու համար այս խիստ հարազատ խորհրդանիշերը ներառուած էին երկրագունդ յիշեցնող շրջանի մէջ եւ բերուած էին, ինչպէս ցուցում էր սգոյ ժապաւէնը, «Քրիստոնէական մշակութային միջազգային կազմակերպութիւններից» եւ, մասնաւորապէս, «Հայաստանի Աւետարանական եկեղեցու» կողմից:

1988 թ. մի շարք ծաղկեպսակներ ձեւաւորուած էին յաւերժութեան աւանդական նշանի՝ պտտուող կեռխաչի (սվաստիկա) ձեւով: 1990-ական թթ. կէսից, արդէն կորցնելով պլակատային գործառոյթը, այդ նշանը խաչի հետ միասին դարձաւ գերիշխող այն ծաղկեպսակների ձեւաւորման մէջ, որոնք Հայաստանի բարձրագոյն ղեկավարութիւնը դնում էր Եղեռնի զոհերի յուշարձանին: Այդպիսի ծաղկեպսակները դրոււած էին նաեւ այլ կազմակերպութիւնների, առանձին անհատների կողմից: Իսկ 1999 եւ 2000 թթ.

ապրիլին կային մէկական ծաղկեպսակային ձեւաւորումներ, որտեղ խաչն ու յաւերժութեան նշանը հանդէս էին գալիս միասին. քառանկիւնի յենքի վրայ ժապաւէնների միջոցով ստեղծուած խաչի միջնամասին ամրացուած էր յաւերժութեան նշանի ձեւով ձեւաւորուած ծաղկեպսակ (նկ. 9): Նոյն տարիներին պատրաստոււած էին ծաղկեպսակներ, որոնք ձեւաւորուած էին կարմիր եւ սպիտակ մեխակներով ստեղծուած յաւերժութեան նշանի իրար վրայ դրուած երկու մակարդակներով. այդպիսիք էին Մորգենթաուի¹³ ընտանիքի (նկ. 10) եւ Ամերիկայի Հայկական համագումարի¹⁴ (նկ. 11) կողմից դրուած ծաղկեպսակները:

Ծաղիկներից կազմուած յաւերժութեան նշանը 1988-ին կարող էր «կրկնուել» նոյն կամ այլ ծաղկեպսակի սգոյ ժապաւէնի վրայ բառային բանաձեւով՝ «Ցեղասպանութեան զոհերի անմոռաց յիշատակին» (նկ. 12) կամ առանձին պլակատի վրայ՝ «Զենք մոռանայ անմեղ զոհերի յիշատակը»:

Ծաղկեպսակ-«ցուցապատուներ» գեղարուեստական ձեւաւորման բարձրակէտը կարելի է համարել 1990 թ. ապրիլի 24-ը, երբ նշոււած էր ցեղասպանութեան 75-ամեակը: Այսպէս, մի ծաղկեպսակի կարմիր հիմնագոյնին Մասիսների սպիտակ մեխակներով ստեղծուած ուրուպատկերի վերելը ծաղիկների իսկ միջոցով «նկարուած» էին սպիտակ խաչ ու աղաւնի եւ հայկական եռագոյն դրօշը (նկ. 13): Այստեղ երեւում են հայ ինքնութեան նշանները, այն է՝ քրիստոնէական հաւատքը (խաչ), պետականութիւնը (եռագոյնը), բիբլիական անցեալը (Արարատը եւ աղաւնին՝ Նոյ նահապետի լրաբերը): Այս դէպքում աղաւնին հանդէս է գալիս ոչ թէ որպէս խաղաղութեան նշան, այլ աւելի շուտ բիրւիական սիմվոլ-

լիկայի մաս է կազմում, որն ընդհանրապէս ներկայացոււած է լեռան գագաթին հանգրուանած տապանի պատկերով (ինչպէս որ է, օրինակ, Հայաստանի Առաջին եւ Երրորդ հանրապետութիւնների գինանշանների վրայ): Ըստ երեւոյթին, տուեալ դէպքում աւելի հեշտ է եղել ծաղիկների միջոցով աղաւնի պատկերելը, քան թէ տապան՝ լեռան գլխին: 1992 թ. յուշարձանին դրուած մէկ այլ ծաղկեպսակում պատկերուած մեծ սպիտակ աղաւնին եւս աւելի շուտ առնչոււած է նոյեան աղաւնուն՝ յոյսի խորհրդանիշին, քանզի այդ պսակը դրուած էր «Հայաստանի յոյս» կազմակերպութեան անուանից:

Հետաքրքիր պատկերազրուութեան մէկ այլ օրինակ է 1990 թ. ապրիլեան մի ծաղկեպսակ-«պլակատ», որի կարմիր մեխակներով հիմնագոյնին սպիտակ մեխակներով պատկերուած էր ցեղասպանութեան զոհերի յիշատակին կառուցուած յուշարձանի երկու մասերի ուրուպատկերը՝ յորեւեանական «75» տարեթուով (նկ. 14, 2): Յիշեալ յուշարձանի պատկերը հանդիպում է 1988 թ. Թատերական հրապարակում յայտնուած առաջին իսկ պլակատներում, օրինակ՝ սումգայիթեան եղեռնին նուիրուած գունագեղ մի պլակատում (նկ. 15): Հետաքրքիր է, որ ցեղասպանութեան զոհերի յուշարձանի պատկերով վերոնշեալ ծաղկեպսակ-«ցուցապատու» 1990 թ. տանում էին հէնց դէպի յուշարձանը: Աւելին, այդ նոյն տարի նուիրաբերութիւնների թուում էր եւ իր տեսակով եզակի մի բան՝ Եղեռնի զոհերի յուշարձանի մանրակերտը: Այն շատ էր յիշեցնում այն մանրակերտերը, որ ցուցաբարները խորհրդային պաշտոնական տօնական շքերթների ժամանակ անց էին կացնում հրապարակների տրիբունաների առջեւից:

կոթողի մանրակերտն ունէր գրեթէ երկու մետր բարձրութիւն եւ պատուած էր սեւ կտորով, որի վրայ բրոնզագոյնով գրուած էր «75», ապա՝ «Եղեռն» ու «Genocide»: Յուշարձանի յաւերժական կրակով հատուածի գրեթէ մէկուկէս մետրանոց մանրակերտն ամբողջութեամբ պատուած էր կարմիր մեխակներով եւ այդ հիմնագոյնին սպիտակ մեխակներով գրուած էր «1915»: Այս յուշարձան-մանրակերտի առջեւի չորս «սալերը» ստորին մասում, սեւ կտորով պատած հիմքի վրայ ունէին սպիտակ ներկով գրուած օսմանեան Թուրքիայում եւ Խորհրդային Միութիւնում հայերի կոտորածների եւ տեղահանութիւնների իրականացման տարեթուեր՝ 1896¹⁵, 1909¹⁶ (սուլթան Համիդի եւ երիտթուրքերի իշխանութեան տարիներին), 1988 (սումգայիթեան ջարդեր, Ադրբեջանի հայութեան տեղահանութիւն), 1990 (Բաքուի ջարդեր, Ադրբեջանի հայութեան տեղահանութեան աւարտ): Այս զանգուածեղ երկմաս կառոյցը դրուած էր պատգարակի տիպի պատուանդան-յենակի վրայ, որը տանում էին չորս երիտասարդ (նկ. 16): Ըստ երեւոյթին, մանրակերտի այդօրինակ «նուիրաբերումը» բնօրինակին կարելի է յարադրել աստուածութեան խորհրդանշանների նուիրաբերմանն իրեն՝ աստուածութեանը. համեմատիր սրբապատկերների նուիրաբերումը նրանց անունը կրող սրբատեղիներին, խաչերի, խաչելութեան սիմվոլների նուիրաբերումը հաւատն առ Քրիստոս մարմնաւորող եկեղեցիներին, վերջապէս, կոմունիստական առաջնորդների նկարների «նուիրաբերումը» հէնց նրանց կենդանի, մահացած կամ սիմվոլիկ կերպարներին: Հետաքրքիր է, որ մանրակերտի հետեւից տանում էին Արարատի պատկերով մեծ պլակատ, այնպէս որ յուշարձանի մանրակերտը դիմացից նայողներին թւում էր

միացած Մասիսների հեռապատկերին: Այդպիսով, յուշարձանի մանրակերտն, ասես թէ նոյն բնանկարով, «գնում էր» դէպի իր նախօրինակը:

1997 թ. ապրիլեան այդպիսի նուիրաբերումների շարքում յիշատակելի է մի ծաղկեպսակ, որտեղ սպիտակ հիմնագոյնին ծաղիկներով իսկ ստեղծուած էր յաւերժական կրակի ուրուպատկերը, այսինքն՝ յուշարձանին տանում էին ոչ թէ դրա ամբողջական, այլ մասնակի պատկերը՝ «յուշարձանի սիրտը» (նկ. 17): Յատկանշական է, որ ծաղկեպսակը «Հայնաւթամթերքի» աշխատակիցների անունից էր, մի կազմակերպութիւն, որը որոշ չափով պատասխանատու էր Հայաստանում «կրակի» առկայութեան համար: 1990-ականների սկզբի էներգետիկ ճգնաժամի «մոլթ» տարիներին յուշարձանի յաւերժական կրակը մարեց ամբողջ քաղաքի լոյսի հետ միասին (այն վառում էին միայն յիշատակի օրերին), փաստ, որը բաւական ցաւազին էր ընդունում ինչպէս Հայաստանի, այնպէս էլ Սփիւռքի հայութիւնը:

* * *

Լինելով ցեղասպանութեան զոհերի «գերեզմանին» ծիսական նուիրաբերման աւանդական ձեւ, ծաղկեպսակը ծնունդ տուեց տրանսպարանտների, որոնք կրում էին նուիրաբերող ծաղկեպսակի դադափարը՝ խօսքի մակարդակով: Այդպիսին է, օրինակ «Յարգանք հայ ժողովրդի միլիոնատր նահատակներու անթաղ հոգիներում» տրանսպարանտը (նկ. 18), որը բանաստեղծական, բայց մի քիչ անյաջող ձեւակերպմամբ (ճիշտ կը լինէր «...անթաղ նահատակներու հոգիներուն») ցեղասպանութեան 75-ամեակի օրերին կոչում էր խոնարհման՝ դրա զոհերի յաւերժ յիշատակին¹⁷: Մէկ այլ յիշեցում-տրանսպար

րանտում՝ «Մեծ Եղեռնի զոհերի յիշատակի յարգումը՝ հայրենիքի ազատագրումն է» (նկ. 13), որ տանում էր Ֆիդայական արտաքինով ու զինուորական համազգեստով մի երիտասարդ, նշում է, թէ գործնակաւում ինչպէ՛ս պէտք է դրսեւորուի այդ յիշողութիւնը: Հետաքրքիր է, որ այդ տրանսպարանտը ձեւաւորմամբ փոխակերպուած ծաղկեպսակ է՝ ծաղիկներն են, որ երիզում են սգոյ գրութիւնը: Այս ծաղկեպսակ-ցուցապատուներից մէկ տարի առաջ մէկ այլ տրանսպարանտ փոքր ինչ այլ կերպ էր ազդարարում Մեծ եղեռնի վերաբերեալ յիշողութեան պահանջման անհրաժեշտութիւնը՝ կոչ անելով ստեղծել հայերի ցեղասպանութեան թանգարան, որը, ի միջի այլոց, վեց տարի անց, 1995 թ., բացուեց յուշահամալիրի իսկ տարածքում:

* * *

Եթէ ծաղկեպսակի ծաղկային ձեւաւորումն «ապահովում էր» ծաղկեպսակ-ցուցապատուի պլակատային մասը, ապա ծաղկեպսակի սգոյ ժապաւէնը, կարելի է ասել, ցուցում էր նրա տրանսպարանտային գործառոյթը: Ժապաւէնների վրայ հանդիպող գրութիւններն, որպէս կանոն, բաղկացած էին երկու մասից. առաջին կէտում այս կամ այն ձեւակերպմամբ նշում էր, որ ծաղկեպսակը ուղղւում է Եղեռնի զոհերի յիշատակին, իսկ երկրորդ կէտում գրուած էր, թէ ում անունից է այն:

Հարկ է նշել, որ այդօրինակ ուղերձների «յետադարձ հասցէն» յաճախ կրում է թաքնուած իմաստ, որը հասկանալի է դառնում հայ ժողովրդի պատմութեան ընդհանուր համատեքստում միայն: Այսպէս, 1988 թ. ապրիլեան մի ծաղկեպսակը երիզող սգոյ ժապաւէնի մի կէտում գրուած էր՝ «Յաւերժ յիշատակ Մեծ Եղեռնի

նահատակներին», իսկ երկրորդ կէտում, որ առաջինից բաժանուած էր ուղղահայեաց գծով, նշում էր, թէ այն ում անունից է՝ «Նախիջեւանեան հայրենակցական միութիւն» (նկ. 19): Հետաքրքիր է, որ վերոյիշեալ տրանսպարանտում իրենք՝ նախիջեւանցի հայերն են ցեղասպանութեան զոհեր, միայն ոչ թէ 1915 թ., այլ՝ խորհրդային շրջանի, այսպէս կոչուած, «սպիտակ» ցեղասպանութեան¹⁸: Եվ կամ վերը նկարագրուած «Մեծ Եղեռնի զոհերի յիշատակի յարգումը՝ հայրենիքի ազատագրումն է» տրանսպարանտ-«ծաղկեպսակի» «յետադարձ հասցէն»՝ «Հ[այ]. Թ[եղափոխական]. Դաշնակցութեան Հ[այաստանի]. կազմակերպութիւն» (նկ. 13), աւելի հասկանալի է դարձնում ցեղասպանութեան զոհերի յիշատակի յարգման միջոցը՝ Հայրենիքի (Արեւմտեան Հայաստանի իմաստով) ազատագրման ճանապարհով, քանզի այդ դադափարը համահունչ է այդ կուսակցութեան քաղաքական ծրագրի կարեւորագոյն դրոյթներին անցեալում եւ 1980-ականներին¹⁹: Նկատենք, որ դիտարկուող տրանսպարանտ-«ծաղկեպսակի» բուն տեքստը «մէջբերումային մտածողութեան» (մանրամասն տես ստորեւ) տիպիկ դրսեւորում է, իրենից ներկայացնելով 1982 թ. ՀՅԴ Ծրագրի «Նպատակ» բաժնի Ե կէտում գրուածի («Թուրքիայի կողմից հայ ազգի դէմ գործադրուած եւ ցարդ անպատիժ մնացած ցեղասպանութեան ոճիրը պէտք է դատապարտուի եւ դարմանուի բռնագրաւուած հողերի վերադարձով եւ վնասների արդար հատուցումով՝ հայ ազգին») փոքր-ինչ խմբագրուած տարբերակը: Գունագեղ ծաղկեպսակ-«պլակատի» ներքնամասում առկայ այդ նոյն «յետադարձ հասցէն» բացատրում է ծաղկեպսակի հայ ինքնութեան սիմվոլներով յագեցած լինելը, քանզի Դաշնակցութիւն կուսակցութիւնը հէնց

իրեն է համարում 1918 թ. հայ պետականության վերականգնման գործի առաել ակտիվ մասնակիցը: Ընդհանրապես, այդ կուսակցություններից բերուած ծաղկեպսակները միշտ էլ աչքի էին ընկնում նրբաճաշակութեամբ: 1997 թ. ապրիլին, օրինակ, Դաշնակցութիւնը յուշարձանին դրեց կուսակցութեան բարդ խորհրդանշանով ու անուանմամբ մի ծաղկեպսակ, ինչը փաստօրէն պլակատային լեզուով արտայայտեց (չնայած այդ ժամանակաշրջանում նրանց նկատմամբ առկայ հետապնդումներին²⁰) կուսակցութեան առկայութեան փաստը Հայաստանի քաղաքական կեանքում (նկ. 20):

Ծաղկեպսակների յետադարձ հասցէն կարող է ծառայել երկրի քաղաքական եւ սոցիալական կառուցուածքի փոփոխութեան ակնառու ցուցիչ: Այսպէս, Դաշնակցութիւն կուսակցութեան նման, իրենց ներկայութեան մասին էին յայտարարում այլ քաղաքական կուսակցութիւններ ու հասարակական կազմակերպութիւններ եւ կամ նոր կառուցուածքային կազմաւորումներ: Վերն արդէն յիշուեցին մի քանի կազմակերպութիւններ: 1988 թ. ապրիլին «Հայ ժողովուրդի Անատակներին» Հայկական ժողովրդային շարժումից» ծաղկեպսակով²¹ իր ներկայութեան մասին յայտնեց նաեւ Լիբանանում գործող այդ կազմակերպութիւնը, որի ինը տարի անց բերուած ծաղկեպսակն արդէն ձեւաւորուած էր կազմակերպութեան գինանշանի պատկերով (նկ. 21): 1999 թ. ապրիլին մենք ֆիքսեցինք ծաղկեպսակներ համայնքների անունից (նկ. 22), ինչն անդրադարձ էր 1996 թ. աշնանը Հայաստանում տեղական (համայնքային) ինքնակառավարման համակարգի ստեղծման: 1997 թ. ծաղկեպսակների լեզվով իրենց մասին յայտարարեցին հացամթերքների (նկ. 23), հեռախօսային կապի (Ար-

մենթել) եւ այլ բնագաւառների մի շարք խոշոր մոնոպոլիաներ: «ОТ ВОИНОВ РОССИИ» («Ռուսաստանի զինուորներից») ծաղկեպսակը վկայում էր Հայաստանում ռուսական զօրակազմի առկայութեան մասին, իսկ հայկական մի զօրամիաւորման բերած նրբագեղ ծաղկեպսակը (նկ. 24) (ընդ որում, քչերից մէկը, որտեղ ծաղիկներից պատրաստուած հիմնագոյնում օգտագործուած էր սեւ գոյնը) վկայում է 1990-ականների կէսին հայկական բանակի դերի աճը: 1990 թ. ապրիլի մի բաւականին մեծ չափերի (այդ օրուայ թերեւս մակերեսով ամենամեծ) ծաղկային ձեւաւորմամբ պսակ էլ ներկայացուած էր նորաստեղծ «Սասունցի Դաւիթ» կամաւորական ջոկատի կողմից: Հարթ մակերեսով կարմիր հիմնագոյնին սպիտակ մեխակներով գրուած էր ջոկատի անուանումը, «75» եւ երեք գոյնի մեխակներով ստեղծուած էր հայկական եռագոյնը (նկ. 25): Զոկատն արդէն հասցրել էր մարտական մկրտութիւն ստանալ Երասխաւանի եւ Նոյեմբերեանի կոիւնների ժամանակ, ապագայում նրան սպասում էին փորձութիւններ կրկին Տաւուշում, ապա Զանգեզուրում: Սպիտակ հիմնագոյնի վրայ սեւ խաչ էր պատկերուած մէկ այլ «մարտական» կազմակերպութեան ծաղկեպսակին. 1999 թ. բերուած այդ պսակի ժապաւէնին գրուած էր՝ «Եղեռնի զոհերի յիշատակին. Ձեռնամարտի հայկական մարտարուեստի ֆեդերացիայից. Մենք, միշտ վրէժխնդիր ենք» (նկ. 26): Վերջապէս, դեպի անութիւնների եւ միջազգային կազմակերպութիւնների բերած բազմաթիւ ծաղկեպսակները բացայայտում էին Երեւանում դիւանագիտական ծառայութիւնների ներկայութեան աստիճանը եւ Հայաստանի արտաքին քաղաքական կապերի աշխարհագրութիւնը: Որպէս օրինակ, յիշենք Հայաստանում ՄԱԿ-ի

ներկայացուցչութեան (նկ. 27) կամ Փարիզի քաղաքապետի բերած ծաղկեպսակները: Վերջինիս «յետադարձ հասցէն» նշող կապոյտ-կարմիր ժապաւէնը, Ֆրանսիական եռագոյնն ապահովելու նպատակով, գեղեցիկ կերպով լրացուել էր ծաղկեպսակի սպիտակ մեխակներով:

Ինչպէս արդէն նշուել է, ծաղկեպսակը սովորաբար յուշարձանին դրոււմ էր կոլեկտիւի եւ, շատ հազուադէպ, անհատի անունից: Այդ իմաստով յատկանշական է «Զօրավար Անդրանիկից» մակագրութեամբ 1997 թ. ապրիլեան ծաղկեպսակը (նկ. 17): Նոյնիսկ եթէ այդ անուան ներքոյ հասկացոււմ էր այս կամ այն կազմակերպութիւնը կամ ընկերութիւնը²², համապատասխան հոլովմամբ նման մակագրութեան (առանց չակերտների) առկայութիւնից ենթադրելի է որպէս «յետադարձ հասցէատիրոջ» հէնց լեզունդար ֆիդայու եւ զօրավարի ներկայութիւնը, որը դեռեւս կենդանութեան օրոք համարոււմ էր բոլոր ճնշուած հայերի պաշտպանը: 1997-ի ապրիլեան չորսեան սգոյ երթում նրա «ներկայութիւնը» համեմատելի է նրա համանման «ներկայութեանը» բազմամարդ Թատերական հրապարակում՝ 1980-ական թթ. վերջին:

Այն ժամանակ՝ 1988 թ. փետրուարի հանրահաւաքներից մէկին, նրա՝ հայոց ազգային հերոսի, «հերոսների մէջ ամենաժողովրդականի» մեծադիր դիմանկարը «բազմութեան ուղիղ կենտրոնում վեր խոյացաւ... Միաժամանակ հնչեց ֆիդայական խրոխտ երգը՝ Սարերից իջաւ մի խումբ ձիաւոր: Բազմութիւնը քարացաւ, արցունքոտ աչքեր երեւացին, օդում սկսեցին ճոճուել բռունցքները: Կարծես նորից յառնեց Անդրանիկը: Ուրիշ էլ ո՞վ, եթէ ոչ՝ նա»²³: Որոշ ժամանակ անց նրա անունը յայտնուեց ցուցարար կանանցից մէկի թղթից պատրաստուած գլխարկին՝

«Անդրանիկ, փրկի՛ր հայերին» գրութեամբ:

«Յետադարձ հասցէատիրոջ» խորհրդանշական ներկայութիւնը յայտնելու ծաղկեպսակային եղանակն օգտագործուեց նաեւ 1989 թ. ապրիլի 24-ին, «Եղեռնի զոհերի յիշատակին» Ղարաբաղ կոմիտէի տղամների կողմից» պսակի միջոցով (նկ. 28). յիշենք, որ «Ղարաբաղ» կոմիտէի անդամներն այդ ժամանակ մոսկովեան բանտերում էին: Այդ օրը Շարժման ղեկավարների ներկայութիւնը «հաստատուեց» նաեւ նրանով, որ դէպի յուշարձան սգոյ երթին մասնակցոււմ էին բանտային հագուստ կրող նրանց նմանակները:

*

Ծաղկեպսակ-«ցուցապաստառի» ոճի բուռն զարգացումն ըստ երեւոյթին բացատրոււմ է այն հանգամանքով, որ աւանդական գիտակցութեան մէջ՝ որպէս զոհուածների յուշարձանին նուիրաբերուող իր, ծաղկեպսակն աւելի է պատշաճոււմ եւ ընդունոււմ, քան թէ պլակատը կամ տրանսպարանտը, չնայած վերջիններս նոյնպէս առկայ էին 1988 թ. ապրիլեան սգոյ երթում, իսկ 1989 եւ 1990 թթ. ապրիլ ամիսներին քանակային առումով նոյնիսկ գերազանցոււմ էին ծաղկեպսակներին: Հետագայ տարիներին ցուցապաստառների թիւը կտրուկ նուազեց եւ 1995 թ. ապրիլին մենք լուսանկարեցինք միայն մէկ, հապճեպ գրուած պլակատ, որով պահանջոււմ էր Դաշնակցութիւն կուսակցութեան կալանուած անդամների ազատում: Նմանապէս կտրուկ կերպով պակասեցին նաեւ քաղաքականացուած ծաղկեպսակ-«ցուցապաստառները»՝ տեղ զիջելով խաչերով, յաւերժութեան նշանով ու աւանդական յուշաժապաւէնով մեծաթիւ ծաղկեպսակներին: Բնորոշ է, որ եթէ «ցուցապաստառային

անդորրութեան» շրջանում դրանք, այնուամենայնիւ, յայտնուում են, ապա դատեղի է ունենում հէնց ցեղասպանութեան զոհերի յիշատակի օրը: Այսպէս, 1995 թ. ապրիլի 24-ին ընդդիմութիւնը սգոյ երթի դուրս եկաւ ցուցապատառներով, որոնք չնայած չունէին բացայայտ հակակառավարական բնոյթ, բայց, այնուամենայնիւ, ակնարկում էին սրուած եւ ոչ պարզ քաղաքական իրավիճակի առկայութիւնը (օրինակ՝ «Հայաստանը՝ առանց հակահայերի») կամ պահանջում էին քաղաքականութեան արդարացի ազատում: Բնորոշ է, որ նոյն ժամանակաշրջանում անցկացուող հանրահաւաքների ժամանակ ցուցապատառային մեթոդը ընդդիմութիւնը բնաւ չէր օգտագործում:

Ծաղկեպսակները եւ ցուցապատառների այդօրինակ էվոլյուցիան լաւ է արտացոլում երկրի քաղաքական իրավիճակի փոփոխութիւնը:

Քաղաքական նկատառումներով ծաղկեպսակի օգտագործման հետաքրքիր օրինակ էր մի խումբ ցուցարարների ակցիան 1989 թ. մարտի 8-ին՝ Կանանց միջազգային օրը: Նրանք Սուրէն Յարութիւնեանին (այն ժամանակ ՀԿԿ ԿԿ-ի առաջին քարտուղար), մատուցեցին ծաղկեպսակ-նուէր՝ ժապաւէնի վրայ «Սիրուշիմ» մակագրութեամբ, կախելով այն Կենտկոմի շէնքի ցանկապատի ճաղերից: Այդ ակցիայի իմաստն այն էր, որ առաջին քարտուղարին երկչոտ, տղամարդուն ոչ վայել քաղաքականութիւն վարելու համար ժողովուրդը յորջորջել էր իգական «Սիրուշ» անունով, որ «Սիրանոյշ» անուն (որում զգացում էր ձայնային նմանութիւն «Սուրէն» անուն հետ. յամենայն դէպս, այդ անունն հինգ տառերից չորսը առկայ են «Սիրանոյշ» անունն մէջ) կրճատ ձեւն է: Յիշենք, որ նրան անուանում էին նաեւ «մօրքուր»:

Յիշեալ գործողութեամբ ընդգծուում էր ոչ միայն քարտուղարի՝ ժողովրդի կարծիքով կանացի բնոյթը, այլեւ այն, որ նա քաղաքական դիակ է: Այդ ակցիայից յետոյ լուրեր տարածուեցին, թէ իբր այդուհետեւ Սիրուշ անունով ննջեցեալների յուղարկւող ման համար ծաղկեպսակ պատուիրելիս պահանջում է անպայման ներկայացնել քաղաքացու մահուան վկայականը:

Այսպիսով, ծաղկեպսակը կարող է ամբողջութեամբ կրել ցուցապատառի գործառնոյթը: Այն կարող է նոյնքան տեղեկատու լինել ինչպէս գեղարուեստական, այնպէս էլ բառային մակարդակով: Ծաղկեպսակները՝ ցուցապատառների նման, ապրում են էվոլյուցիա, ինչը ցուցիչ է ծառայում ոչ միայն քաղաքական իրավիճակի փոփոխութեան, այլեւ ինքնութեան ձեւափոխման:

ԾԱՆՕԹԱԳՐՈՒԹԻՒՆՆԵՐ

- 1 Հեղինակը խորին շնորհակալութիւն է յայտնում իր գործընկեր Լ. Յ. Արքախանեանին այն յօդուածի համատեղ քննարկումների եւ օգտակար խորհուրդների ու դիտողութիւնների համար:
- 2 Տե՛ս օրինակ. M. Rickards, *Posters of the First World War*. New York, 1968, p. 8-13; J. Barnicoat, *A concise history of posters: 1870-1970*. New York, 1972, p. 183-184, 223; M. Fischer and M. Abedi, *Debating Muslims: cultural dialogues in post-modernity and tradition*. Wisconsin, 1990, p. 335-382; W. Hanaway, *The symbolism of Persian revolutionary posters*. - «Iran Since the Revolution: Internal Dynamics, Regional Conflict, and the Superpowers», New York, 1985, p. 31-50; Cultural representations in the Middle East: political cartoons [Special issue]. - «Princeton Papers: Interdisciplinary Journal of Middle Eastern Studies», Spring 1997, vol. VI. Նկատենք, որ այս եւ մնամատիպ մի շարք այլ ուսումնասիրութիւնների յենքը կազմում են մամուլի հրապարակումներում տեղ գտած պատկերները, բազմատիրած, բացառապէս պրոֆեսիոնալ մկարիչների ստեղծած պատատները, ծաղրանկարները եւ այլն:
- 3 Ծարժման ընթացքի համապարփակ ուսումնասիրութիւնը տե՛ս. Mark Malkasian, «Gharabagh!»: The Emergence of the National-

Democratic Movement in Armenia. Detroit, 1996. Ծարժման ազգագրական ուսումնասիրութիւնը տես, օրինակ՝ Լ. Արքախանեան, *Ծէշը, նախաթատրոնը եւ Թատերական հրապարակը*. - Բեմ, 1990, թի 1, էջ 7-19: Նոյնը, *Քառսը եւ կոսմոսը ժողովրդական ելոյթների կառուցուածքում*. *Ղարաբաղեան շարժումը ազգագրագետի հայացքով*. - Մշակոյթ, 1990, թի 2-3, էջ 14-21: Նոյնը, *The anthropologist as shaman: interpreting recent political events in Armenia*. - Beyond boundaries: understanding, translation and anthropological discourse, Oxford, UK/Providence, USA, 1993, p. 100-116.

4 Հայերէնում «ցուցապատառ» հասկացութիւնը ներառում է նաեւ ուսերէնի միջոցով ներմուծուած հայ խօսակցական եւ գրաւոր լեզուում այսօր արդէն քիչ գործածուող «պլակատ» եւ «տրամապարան» երեւոյթները: Քանի որ այն աշխատանքում ցուցապատառներին շատ յաճախ տարբերակուած վերաբերմունք է ցուցաբերում, ուստի, միթի առաւել ճշգրիտ մատուցման նպատակով, գերադասելի համարեցինք նշել եզրերի օգտագործումը:

5 Տե՛ս, օրինակ՝ Լ. Աբրամյան, *А. Марутян. Транспаранты и плакаты как зеркало Карабахского движения*. - Всесоюзная научная сессия по итогам полевых этнографических и антропологических исследований 1988-1989 годов. Тезисы докладов. Алма-Ата, 1990, с. 122-123. S. Platz, *The Kharabagh demonstrations: visual and verbal representations of Armenian identity*. - The annual of the society for the study of Caucasia. 1991, # 3, p. 19-30. H. Marutyan, *The genocide of the Armenians. Historical memory and transformation of ethnic stereotypes (according to the materials of banners and posters of the Kharabagh Movement)*. - Synopsis, 3, 1994, p. 111-119. Յ. Մարութեան, Լ. Արքախանեան, *Հայ ինքնութեան պատկերագրութիւնը (ըստ Ղարաբաղեան շարժման մի խումբ ցուցապատառների)*. - Հայեացք Երեւանից. հայագիտական, 1997, թի 4, էջ 56-68: Յ. Մարութեան, *Ղարաբաղ-Հայաստան փոխարարները ըստ Ղարաբաղեան շարժման ցուցապատառների - Արդի էթնամշակութային գործընթացները Հայաստանում*, 1, 1997, էջ 20-22: **Ա. Марутян. Иконография Карабахского движения и трансформация армянской идентичности**. - «Вопросы этнологии Кавказа». Первая международная конференция. Краткое содержание докладов, Ереван, 1999, с. 27-31. Յ. Մարութեան, *Ղարաբաղեան շարժման ցուցապատառները՝ որպէս մշակութային նոր դրսեւորում եւ փոփոխուող հասարակութեան ցուցիչ - Ժողովրդավարութեան զարգացումը Հայաստանում*, Երեւան, 1999, էջ 184-189: **Ա. Марутян,**

Л. Абрамян. Тема геноцида в иконографии армянской идентичности: венки-плакаты (по материалам Карабахского движения). - Лавровские (Среднеазиатско-Завкавказские) чтения 1998-1999 гг. Краткое содержание докладов. Санкт-Петербург, 2001, с. 126-128; Յարութեան Մարութեան, *Հայ պոեզիան որպէս ինքնութեան պատկերագրութիւն (ըստ Ղարաբաղեան շարժման ցեղասպանութեանը նուիրուած ցուցապատառների)*. - Հայկազեան հայագիտական հանդէս, Պէլրոյթ, 2000, հ. 1, էջ 269-306; Յարութեան Մարութեան, *Եղեռնը Ղարաբաղեան շարժման ցուցապատառներում*. - Հայեացք Երեւանից, 2000, թի 4, էջ 6-13; **А. Марутян. К вопросу о роли исторической памяти в национальных движениях**. - IV Конгресс этнографов и антропологов России. Тезисы докладов, М., 2001, с. 96; Harutyun Marutyan, *Iconography of the Gharabagh Movement. An Index of the Transformation of Armenian Identity*. - Armenian Forum, 2001, vol. 2, no. 4, Winter 2000 (Published January 2003), p.39-55

6 Սիլվա Կապուտիկեան, *Մտորումներ ճանապարհի կէտին*, Երեւան, 1961, էջ 112:

7 Ազատ Նիլազարեան, *Բանաստեղծի ճանապարհը (ՀՀ ԳԱԱ ակադեմիկոս Սիլվա Կապուտիկեանի ծննդեան 80-ամեակի առթիւ)*, ՊԲՀ, 1999, թի 2-3, էջ 6:

8 Այդ տրամապարաններից մէկի վրայ գրուած էր «Հատուցէք հողերը», իսկ Մասիսների ուրուպատկերով մի պլակատին՝ «Արդար լուծէք հայոց հարցը»: Տե՛ս Մկրտիչ Արմէն, *Ջեկուցազիր Հայաստանի կոմունիստական կուսակցութեան Կենտրոնական կոմիտէին*. - Գրական թերթ, 1991, 6 սեպտեմբերի: Մէկ այլ պլակատեւսի վկայութեամբ, ցուցարար «երիտասարդները տանում էին պատատներ՝ խոշորատառ կարգախօսներով՝ «Ազատութիւն եօթ հայրենաւերներին», «Պահանջում ենք հայկական դատի արդար լուծում», «Հայոց դատը անժամանցելի է», «Պահանջում ենք մեր բռնագրաւուած հողերը»: Պատատների վրայից իջել եւ քայլող շարքերի վրայ թեւածում էր հազարաւոր շուրթերից պոկուած երեք հնչիւնը՝ «Հո՛-դե՛-րը», «Հո՛-դե՛-րը»...: Երկու... պատառներ... տանում էին սատինի մի կտոր՝ վրան անվարձ ձեռքով գրուած... «Արդար լուծէք Հայոց հարցը»: Տե՛ս Սիլվա Կապուտիկեան, *Էջեր փակ գորոցներից*, Երեւան, 1997, էջ 60, 77: Տե՛ս նաեւ Հայոց ցեղասպանութեան թանգարանի ցուցադրանքը:

9 Տե՛ս. 1915 թուականի Եղեռնի զոհերի յիշատակը յաւերժացնող կոթողի բացումը. - Սովետական Հայաստան, 30 հոյեմբերի 1967 թ., թի 279 (14240):

10 Տե՛ս օրինակ. Արարատ, Մայր Աթոռ Սբ. Էջմիածին, «Էրեբունի» հրատ., 1984: H. Petrosyan. *The Sacred Mountain*. – In: *Armenian Folk Arts, Culture and Identity* (edited by L. Abrahamian, N. Sweezy). Bloomington and Indianapolis, 2001, p. 33-39.

11 Հետաքրքիր է, որ Իրանական յեղափոխության (1979 թ.) ցուցապատումների մեջ էլ են հանդիպում մանրանկարչության սկզբունքներով ձևավորված նմուշներ: Տե՛ս օրինակ, Michael M. J. Fischer and Mehdi Abedi, նշ. աշխ., էջ 356, 358, գլ. 6.10, 6.11.

12 Սրբազան բովանդակությամբ գրքի պաշտամունքի մասին տե՛ս. Յ. Մարութեան, «Տան սուրբ» երեւոյթը. *ակունքների հարցը եւ մերօրեայ դրսեւորումները*. – «Հայոց սրբերը եւ սրբավայրերը. ակունքները, տիպերը, պաշտամունքը», Երեւան, 2001, էջ 337-346:

13 Ամերիկեան Ազգայնաբանական եւ քաղաքական գործիչ Հենրի Մորգենթաուն 1913-16 թթ. ԱՄՆ-ի դեսպանն էր Թուրքիայում: Իր յուշերում նա փաստական միջոցով հիմնական վրայակարարություն է 1915 թ. Մեծ եղեռնը՝ այն համարելով «պատմության ամենամեծ ոճիրը»: Մանրամասն տե՛ս. Հ. Մորգենթաուն, *Ամերիկեան դեսպան Հենրի Մորգենթաունի յուշերը եւ հայկական եղեռնի գաղտնիքները*, Երեւան, 1990: Տե՛ս նաեւ. Հենրի Մորգենթաուն եւ հայ ժողովուրդը, Երեւան, 1999: 1999 թ. ապրիլի 22-ին կայացաւ «Հայոց ցեղասպանութիւնը, դեսպան Հ. Մորգենթաուն եւ ամերիկեան արձագանքները 1914-23 թթ.» միջազգային գիտաժողովը, իսկ յաջորդ օրը նրա անուամբ կոչուեց Երեւանի Ա. ջափնեակ համայնքի դպրոցներից մէկը, եւ ապա նրա գերեզմանից վերցրած հողով աճիւնասափորը տեղադրուեց Հայոց ցեղասպանության զոհերի յուշահամալիրի յուշապատի մէջ: Արարողութիւններին մասնակցելու համար Երեւան էին ժամանել Հ. Մորգենթաունի թոռը, ծոռները: Տե՛ս. Ազգ, 21 եւ 24 ապրիլի 1999, թիւ 71 եւ 74 (1816, 1819):

14 Այս կազմակերպութիւնը, ի թիւս ԱՄՆ-ի հայության համախմբմանն ուղղուած տարաբնոյթ գործունէութեան, նաեւ հակազդում է հայերի ցեղասպանութիւնը հերքելու փորձերին, անդրադառնում ցեղասպանութիւնը մերժելու թուրքական կառավարության բոլոր ճիգերին եւ պայքարում, որպէսզի ԱՄՆ-ի կառավարութիւնը ճանաչի հայերի ցեղասպանութիւնը:

15 1894-96 թթ. կոտորուեց շուրջ 300 հազ. հայ, 100 հազ.-ը բռնի մահմեղականացուեց, եւս 100 հազ.-ը տարագրուեց տարբեր երկրներ, ամալացան հայաբնակ բազմաթիւ վայրեր: 1894-96 թթ. հայկական կոտորածները արեւմտահայության առաջին զանգուածային ցեղասպանության փորձն էր: Տե՛ս, օրինակ. *Братская помощь пострадавшим в Турции армянам*.

Литературно-научный сборник. М., 1897 (Введение, Отдел II); Հայ ժողովրդի պատմութիւն, Երեւան, 1981, Բ. VI, էջ 276: Ջ. Կիրակոսեան, *Երիտթուրքերը պատմութեան դատաստանի առաջ (19-րդ դարի 90-ական թթ. – 1914)*. գիրք առաջին, Երեւան, 1982, էջ 56:

16 1909-ի կիլիկիահայության եւ, մասնաւորապէս, Ադանայի հայության ջարդերին զոհ գնաց շուրջ 30 հազ. հայ: Տե՛ս. Ծ. Թ. Թորոսեան, *Կիլիկիայի հայերի ազգային-ազատագրական շարժումները 1919-1920 թթ.*, Երեւան, 1987, էջ 25-37: Տե՛ս նաեւ. Ս. Պարթեւեան, *Կիլիկեան արհաւիրքը*, Կ. Պոլիս, 1909: Մուշեղ եպիսկոպոս, *Ադանայի ջարդը եւ պատասխանատուները*, Բոստոն, 1910: Յ. Պապիկեան, *Ադանայի եղեռնը: Տեղեկագիր Յակոբ Պապիկեանի, Կ. Պոլիս, 1919: Կիլիկեան կսկիծներ (Վաերաթողութիւն Կիլիկիոյ կաթողիկոսութեան դիւանէն 1903-1915)*, Պէյրութ, 1927: Ա. Ս. Համբարեան, *Կիլիկիայի 1909 թ. հայկական կոտորածները*. – ՊԲՀ, 1988, թիւ 1, էջ 13-29:

17 Այս հարցի առիթով ընթերցողին խորհուրդ կը տանք ծանօթանալ հետեւեալ ուշագրաւ յօդուածին. Մեսրոպ արք. Աշճեան, «Ապրիլեան անհատակաց սրբադասման հարցը». – «Հայոց սրբերը եւ սրբավայրերը. ակունքները, տիպերը, պաշտամունքը», Երեւան, 2001, էջ 426-432:

18 Խորհրդային Ադրբեջանում իրականացուած «սպիտակ ցեղասպանութեան» մասին վերջին գիտական հրատարակումը տե՛ս, օրինակ. Ю. С. Барсегов. *Геноцид армян – преступление по международному праву*. М., 2000, с. 226-232.

19 Հմմտ. ՀՅԴ 1892 թ. Առաջին ընդհանուր ժողովում ընդունած Ծրագիր-Կանոնագրի «Նպատակ» մասում ձեւակերպուած բանաձեւը՝ «Հ. Յ. Դաշնակցութեան նպատակն է ապստամբութեան միջոցով Տանկահայաստանում ձեռք բերել քաղաքական եւ տնտեսական ազատութիւն» եւ ՀՅԴ ԻԲ ընդհանուր ժողովի կողմից հաստատուած «Ծրագրի» Բ մասի «Նպատակ» բաժնի Ա եւ Գ կետերը՝ «Կերտել Ազատ, Անկախ եւ Միացեալ Հայաստան», «Միացեալ Հայաստանի սահմանների մէջ պիտի մտնեն Սեւրի դաշնագրով սահմանուած հայկական հողերը, ինչպէս նաեւ Նախիջեւանի, Ախալքալաքի եւ Ղարաբաղի շրջանները»: Տե՛ս. *Հրաչ Տասնապետեան, Հ. Յ. Դաշնակցութիւնը իր կազմութեան միջին ժ. ընդհ. ժողով (1890-1924)*, Աթէնք, 1988, էջ 22: Հայ Յեղափոխական Դաշնակցութիւն. Ծրագիր, հաստատուած ԻԲ ընդհ. ժողովին կողմէ, 1982, էջ 25-26:

20 Հայաստանի հանրապետութեան նախագահի 1994 թ. դեկտեմբերի 28-ի հրամանագրով ՀՅԴ գործունէութիւնը ժամանակաւորապէս դադարեցուել էր: Տե՛ս. Հայաստանի հանրապետու-

թիւն, 29 դեկտեմբերի 1994 թ., թիւ 254 (1118):

21 Տե՛ս «Երկաթէ շերտի», Բեյրութ, 1988, թիւ 13, լուսնիս, բացառիկ: Հմմտ. Գեորգ Յազըճեան, *Երեւանի սփյուռքահայ ուսանողութեան մասնակցութիւնը արցախեան շարժմանը (20-25 փետրուարի 1988 թ.)*, Ազգ, 4 մարտի 1998 թ., թիւ 36 (1539):

22 Ամենայն հաւանականութեամբ, ցուցապատուող «Զօրավար Անդրանիկ» հայոց համազգային

միութեան (նախագահ՝ ըմբշամարտի գծով աշխարհի նախկին շեմպիոն Նորայր Մուշեղեան) կողմից էր, որը դեռեւս 1990-91 թթ. ակտիւ գործունէութիւն էր ծաւալել Փարիզից զօրավար Անդրանիկի աճիւնը Հայաստան տեղափոխելու կապակցութեամբ:

23 Խոսքով Խլղաթեան, «Յաղթական բազուկը շարժի՛ր վերստին». – Հայաստանի հանրապետութիւն, 18 փետրուարի 2000 թ., թիւ 29 (2499):

WREATHS AS POSTERS AND BANNERS
(the Genocide and the Iconography of the Armenian Identity)

HARUTYUN MARUTYAN

Summary


The late 1980s and 1990s were the years of active formation of new Armenian identity. The article discusses this process through the prism of the wreaths layed to the memorial dedicated to the victims of the Armenian genocide of 1915. The author shows that wreaths were often carrying out the function of posters and banners, being informative both in verbal and artistic levels. Like posters and banners, wreaths were undergoing evolution, which serves as an index of changing in the political situation, as well as in the identity of the Armenian nation in general.



Այ. 1



Այ. 2



Այ. 3




Այ. 4



ԱԿ. 5



ԱԿ. 6



ԱԿ. 7



ԱԿ. 8




ճկ. 9



ճկ. 10



ճկ. 11



ճկ. 12




ՁԿ. 13



ՁԿ. 14



ՁԿ. 15



ՁԿ. 16



ԱԿ. 17



ԱԿ. 19




ԱԿ. 18



ԱԿ. 20



գկ. 21




գկ. 22




գկ. 23




գկ. 24



ԱԿ. 25



ԱԿ. 26



ԱԿ. 27